

Date – 31/05/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Chief Minister Pu Lalduhoma'n Mizo, Chin leh Kuki-te chu hnam pakhat, chhungkaw pakhat an ni a ti.
2. Aizawl Traffic Police-ten naktuk June ni 1 atangin kea kalte kawng kanna tur, Zebra Crossing kaihnawiha dan bawhchhiate lakah na zawkin hma a la tan dawn.
3. Synod Prison Ministry-in Mizorama lungin 10 a zirchianna-ah Jail tang za a 76 point 7 te chu thalai kum 18 atanga kum 40 inkar an ni a, an tan chhan tam ber chu ruihhlo a ni.
4. Prime Minister Narendra Modi-a'n khaw lum zual chho mek laka fimkhur turin ram mipuite a ngen.



JOSHUA VAN

Chief Minister Pu Lalduhoma chuan Mizo, Chin leh Kuki-te chu hnam pakhat, chhungkaw pakhat an ni a ti.

Nizan khan Mizoram Mixed Martial Arts Association (MISMA) buaitsaih MISMA Fight Night ,R. Dengthuama Indoor Stadium, Mualpui-ah khelh a ni a. He hun hi Chief Minister Pu Lalduhoma'n hmanpuiin , UFC Flyweight Champion Joshua Van chu Special Guest a ni. Chief Minister chuan Asia chhimchhak ram atanga UFC Champion hmasa ber Joshua 'The Fearless' Van chawimawi a ni chu Zoram mipuite tan chhinchhiah tlak tak a nih thu a sawi a. Mizo, Chin leh Kuki-te chu hnam pakhat leh chhungkua pakhatan nih thu sawiin, inzawmna leh unauna tha neih a pawimawh an,a ti a. Joshua Van chu a mite aiawhin khawvel hmaah a ding a, chu chuan hnam inpumkhatna leh inpawhna a tichak zual a ni, a ti.

Pu Lalduhoma chuan Joshua Van chu chhuanawm a tih thu sawiin, a professional record ropui tak - vawi 17 hnehna chang tawhin, vawi 9 knockout hmangin hnehna a chang tawh a ti a, he record hian score mai piah lamah thalaite tan chona a siam a ni, a ti.

Sports Minister Pu Lalnginglova Hmar-in MISMA Fight khuhhawna thusawiin, Mizorama Boxing leh contact sports hrang hrang 'Centre of Excellence' sakna tur cheng vaibelchhe 38 leh nuai 39 chuang chu Ministry of DoNER hnuai 'North East Special Infrastructure Development Scheme - Other Than Roads Infrastructure (NESIDS-OTRI)' atangin pawmpuina an hmuh tawh thu chu sawiin, lawmawm a tih thu a sawi a ni.

He hunah hian Joshua Van pawhin thu a sawi a, tualchhung khawtlang community hrang hrang - CRCM, Chin Community, Zofa Global, Zoro, Muay Thai Association of Mizoram leh Assam MMA te chuan UFC Champion Joshua Van hnenah chawimawina an hlan bawk.



FUEL PRICE

Tuialhthei man pung zel avangin lirtheia eizawngten harsatna an tawk chho mek a, hetiang zela tuialhthei man a san chhoh chuan thil man pawh a sang chho tura rin a ni.

West Asia buaina kaihnawihah US leh Israel-in Iran an run hnu-ah tunthla ni 15 khan a vawi khat na'n India ramah tuialhthei man tihsan a ni a, hemi hnu hian ni 14 chhungin tuialhthei man hi vawi 5 danglam tawhin, vawi 1 chu a tlahniam a, a bak zawngah chuan a sang a ni. Kar hmasa Inrinni kha tuialhthei man pun hnuhnug ber a ni a, litre khatah petrol chu Rs 2 leh pawisa 58-in a sang a, diesel chu Rs 2 leh pawisa 56-in a sang bawk a, tun dinhmunah Aizawlah petrol liter-1 Rs 106 leh pawisa 39 diesel litre-1 Rs 95 leh pawisa 7 a ni mek ani.

Akashvani News Aizawl chuan Aizawl khawpuia lirthei hmanga eizawngtute leh sumdawng thenkhat kawmin, tuialhthei man sang hian an eizawna-ah nghawng a neih dan a zirchiang a; sumdawngte chuan bungraw lak chungchangah harsatna an la tawk rih lo nia an hriat thu an sawi rualin, tuialhthei man a san reng chuan thil man pawh a san chhoh thuai an rin thu an sawi a ni.

Lirthei hmanga eizawng, Aizawl Two-wheeler Taxi Association president Pu Lalhmunmawia chuan, petrol man sang chuan an eizawnaah nghawng a neih nasat thu a sawi a, tun hmaa ni khata petrol leina atana sum an sen thin aiin tunah chuan Rs 50-100 velin an seng tam tawh zawk tih a sawi a, hetih rual hian passenger phurh man erawh a ngai reng a la nih thu a sawi bawk a; tun ang renga tuialhthei man a sang a nih chuan passenger phurh man pawh tihsan hun a la awm lo ang tih a sawi theih loh, a ti ani.

<><><>

TRAFFIC

Aizawl Traffic Police-te chuan naktuk June ni 1 atangin kea kalte kawng kanna tur, Zebra Crossing kaihhnawiha dan bawhchhiate lakah na zawkin hma a la dawn.

Aizawl Traffic Police Superintendent Pu C. Vanlalvena thuchhuahin a tarlan danin, Aizawl khawpui hmun hrang hrangah mipui ke-a kalte him zawk nan leh traffic enkawlina a felfai theih zawk nan Zebra Crossing-te siam a ni a. The Motor Vehicles (Driving) Regulations, 2017 Rule No. 9 leh 22 (iv)-in a sawi angin Lirthei khalhtuten Zebra Crossing thlen dawnin fimkhur taka tlan muan a, kawng kan turte tan a hlauhawm leh hlauhawm loh en lawk thin tur a ni a ti a. Zebra Crossing-ah lirthei din phal a ni lova, hei hian traffic jam laia din te, lirthei atanga chhuk leh in phurh (pick & drop) bakah bungrua load leh unload chungte pawh a huam vek tih a sawi ani.

Naktuk, June ni 1 atangin Aizawl Traffic Police-te chuan Zebra Crossing kaihhnawiha dan bawhchhiate lakah na zawkin hma a la dawn tih sawiin, Dan bawhchhiate chu The Motor Vehicles (Amendment) Act, 2019 section 177 leh section 184 tlawh chhanin hrem theih an ni a ti a. Ke a kalte pawh kawng kan dawna fimkhur taka kawngpuite enchiang hmasa thin turin a ngen a ni.



CBI ON LENGPUI LAND

Central Bureau of Investigation (CBI) chuan Indian Air Force tana Lengpui rama mimal ram lei chungchanga dan bawhchhiatna awm ni a sawi chu an chhui tan.

Lengpui a Parchhingchheng ram an tih a tira neitu (original land holder) thenkhatin Akashvani News Aizawl an hrilh danin CBI officer-te hi tawng lettute hruai-in Lengpui khua-ah Ningani khan an kal a. A tira ram neitu thenkhat chu Lengpui VC House-ah kokhawmin thil an zawtfiah a. He tah hian Lengpui VC pawh koh ve a nih thu an sawi. CBI official-te zawhna chhangin ram neitute chuan sorkarin an ram a lei khawm tih an hriatpui hauh loh thu leh an hming ziah hnan ni a lehkha thenkhat a lang pawh chu anmahni ziah a nih loh thu a sawi a. An hming ziah ni awm tak chu a lem a nih thu an sawi. VC-te pawhin mimal ram laksak a nih leh Garden LSC a leh a nih dawnin ram teh a awm a nih pawhin an hriatpui loh thu an sawi bawh. Ram neitu zinga pakhat chu Aizawl a awm a ni a, a hriselna a that loh avangin an kal chillh niin an sawi bawh a ni.

Puan Tawh angin Lengpui ram lei chungchangah hian Mizoram Pradesh Congress Committee (MPCC) chuan Aizawl a CBI site office-ah FIR an thehltut a, MNF legal board pawhin Chief Secretary, Chief Vigilance Officer ni bawh hnenah CBI kolut tura ngenna an lo thehltut tawh a. Sorkar pawhin he thil hi CBI-in an duh anga an chhui theih na'n general consent pekna atana hriattirna a lo chhuah tawh bawh a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



PRISON MINISTRY

Synod Prison Ministry-in Mizorama lungin 10 a zirchianna-ah Jail tang za a 76 point 7 te chu thalai kum 18 atanga kum 40 inkar an ni a, an tan chhan tam ber chu ruihhlo a ni.

Synod Prison Ministry-in nikum June ni 16-a Inspector General of Prison phalna an dil anga Mizorama Jail 10-a mi tang 1,735 te an zirchianna chu tun hnai khan a tichhuak a. Jail tang zawng zawng zinga za a 76 point 7 te chu thalai kum 18 atanga kum 40 inkar an ni a. Tang zingah kum 60 chunglam engemawzat awmin, an tan chhan tam ber chu kumtling lo pawngsual thubuai, POCSO, 2012 thubuai a ni . Zirchianna chuan mipat-hmeichhiatna lama inthlahdahna leh sual dang a inzawm thuk hle ni-a sawiin, Jail tang zingah kum 18 tlin hmaa mipat-hmeichhiatna hmang tawh zaa 58 point 3 an awm a. Tang zingah lehkha zir sang lo an tam hle a, pawl 12 leh a hnuai lam chu za a 91 point 3 an ni a ti bawk.

Jail tangte tan chhan tam ber chu ruihhlo niin, zu/ruihlo ti leh ruihhlo tawlhruk vanga tang belhkhawm chu za a 47 point 8 a ni a. Rukruk leh mi rawk vanga tang zaa 25 point 5 awmin, pawngsual/khuaikhem/POCSO thubuai vanga tang chu za a 18 a ni a. Tualthah leh ram dan bawhchhiatna dang vanga tang belhkhawm chu za a 19 point 9 an awm bawk.

Zirchianna chuan mihring bitna, khawpuiah sualna a pung nasa hle tih sawiin, Central Jail, Women Jail leh Aizawl district Jail-a tang belhkhawm chu Mizoram puma tang zawng zawng belhkhawm zaa 60.5 an tling a ti a, Jail tang zawng zawng zaa 40.2 chu AMC huamchhung a mi te an ni a ti a. Ramri hnaihah sualna a sang tih theih turin District tina mihring cheng zat leh jail tang zat atanga chhutin ramri hrula district jail-ah te tang an tam niin a tarlang bawk a. Hei hian mihring bitna hmun leh ramri hrulah te dan leh thupek tha lehzuala kenkawh a tul hle tih a lantir niin a sawi.



MANN KI BAAT

Prime Minister Narendra Modi-a'n khaw lum chho mekah ram mipuite chu fimkhur tura chahin sorkar dept hrang hrang-in inkaihhruaina an siamte zawm turin a ngen.

Vawiin Akashvani-a Mann Ki Baat hun a hmanna-ah he thu hi a sawi a, mipuite chu tui in tam turin leh ni sen sa hnuai an chhuah hunah fimkhur turin a chah a ni.

Prime Minister chuan hmun hlui leh thil hluite vawng him turin sorkarin hma a la zel dawn tih sawiin Malhar, Chhatisgarh-a dar thleng vang tak 3 hmuhchhuahte chu kum zabi 6 atanga 7-na inkara Panduvanshi dynasty hun laia mi an ni, a ti a, tunhnaia Netherlands-a a zin tumin a bika inkhawm buatsaihah Chola hun laia mi dar thlengte, India hnenah an hlan let a ni, a ti bawk.



PUNE HOOCH TRAGEDY

Maharashtra-a Pune khawpuiah zu chhe in vangin mi 21 an thi tawh a, Pune khawpuiah mi 7, Pimpri-Chinchwad leh Uruli Kanchan bialah mi 14 an thi a ni.

He thil vanduaina thleng thubuaiah hian mi 10 man an ni tawh a, thubuai chhui hna hi Crime Investigation Department (CID) kutah hlan a ni.

He thil thleng kaihhawihah hian sorkar hnathawk 22 suspend an ni tawh bawk a, an zingah hian police 9 leh State Excise Department mi 13 an tel a ni.

Hetih lai hian state Food & Drug Administration chuan Bhiwandi-a Rex International kudam atangin methanol, Kg sang 6 vel an man a, he company hian a dan lova zu siam thinte hnenah bawlhlo an supply thin nia hriat a ni.

